

կան հաջող աշխատանքի և պրակտիկայում դրա արդյունքների ներդրման համար:

Ակադեմիայի տարեկան ընդհանուր ժողովին ներկա էին Հայկական ՍՍՀ Գերագույն սովետի նախագահության նախագահ Ն. Հարությունյանը, հանրապետության Մինիստրների սովետի նախագահ Գ. Արզումանյանը, Հայաստանի կոմկուսի Կենտկոմի քարտուղար Ռ. Խա-

չատրյանը, Հայաստանի կոմկուսի նրանի քաղկոմի առաջին քարտուղար Լ. Ղարիբջանյանը:

ԳԱ գիտությունների բաժանմունքների ժողովներում, որոնք տեղի ունեցան մարտի 19—21-ը, քննարկվեցին 1972 թ. գիտական գործունեության հիմնական արդյունքները և լավեցին գիտական զեկուցումները:

Մ. ԿԱՐԱՊԵՏՅԱՆ

ԳԻՏԱԿԱՆ ՆՍՏԱՇՐՋԱՆ՝ ՆՎԻՐՎԱԾ ԳԱՐԵԳԻՆ ԼԵՎՈՆՅԱՆԻ ԾՆՆԴՅԱՆ 100-ԱՄՅԱԿԻՆ

1973 թ. հունվարի 29-ին տեղի ունեցավ ՀՍՍՀ ԳԱ արվեստի ինստիտուտի գիտական նստաշրջանը՝ նվիրված հայ մշակույթի մեծ երախտավոր, արվեստի վաստակավոր գործիչ Գարեգին Լևոնյանի ծննդյան 100-ամյակին:

Նստաշրջանը բացեց Հայկական ՍՍՀ կուլտուրայի մինիստր Ռ. Պարսամյանը: Նա բնորոշեց Լևոնյանին իբրև մի ականավոր դեմքի, որը նշանակալից ավանդ է ներդրել հայ մշակույթի տարբեր մարզերում՝ մամուլի պատմություն, հայ աշուղների կյանքին ու ստեղծագործությանը նվիրված ուսումնասիրություններ, թատերագիտություն, տպագրության պատմություն, արվեստագիտություն, ճարտարապետություն:

Նստաշրջանում լավեց Լևոնյանի գիտական ժառանգությանը նվիրված երեք զեկուցում:

Բանասիրական գիտությունների թեկնածու Մուշեղ Նարյանի զեկուցումը նվիրված էր Լևոնյանի երախտյարժին՝ «Հայ աշուղներ» զրբքին, որը լույս է տեսել 1892 թ. Ալեքսանդրապոլում, երբ Լևոնյանը հաղիվ քսան տարեկան էր: Առաջին զրբքին հաջորդեցին իր հորը՝ Զիվանուն, Բաղդասար Դպիրին, Գևորգ Ախվերդյանին, Սայաթ-Նովային, Նազանուն, Շերամին նվիրված արժեքավոր ուսումնասիրությունները, որոնք նորություն էին մեր իրականության մեջ: Ղևոնդ Ալիշանը ժամանակին դրվատանքի խոսք ասաց այդ զրբքի առթիվ:

Արվեստաբանության թեկնածու Ստեփան Թոփչյանի զեկուցման թեման էր Գարեգին Լևոնյանի զեղագիտական հայացքների քննությունը: Զեկուցողն ընդգծեց, որ Գ. Լևոնյանը հայ իրականության մեջ առաջիններից էր, որ հետևողականորեն, տարիներ շարունակ իր խմբագրությամբ հրատարակված «Գեղարվեստ» տարեգրքում հրահրում, տարածում և հաստատում էր զեղագիտական գաղափարներ: Նրա ժառանգության արժեքն այս ասպարեղում աներկրայելի է հայ էսթետիկայի պատմության մեջ, և մենք չենք կարող արժանին չհատուցել գիտնականին:

Արվեստաբանության թեկնածու Մանյա Ղա-

ղարյանը անդրադարձավ «Գարեգին Լևոնյանը և կերպարվեստի հարցերը» նյութին:

Ստեղծագործական կյանքի առաջին իսկ տարիներից արվեստաբանությունը դարձավ Լևոնյանի կյանքի նպատակը, դաշտունքի կարևորագույն առարկաներից մեկը:

«Գեղարվեստ» տարեգիրքը կոչված էր ծառայելու ժողովրդի զեղագիտական դաստիարակությանը, հայ և օտար նկարիչների ստեղծագործությունների պրոպագանդանը, հայ մշակույթի բազմակողմանի ուսումնասիրությանը: Լևոնյանը ձեռնարկեց հայկական կիրառական արվեստի պատմության ամբողջական ուսումնասիրությունը, որի մեջ մտնում էին խեցեգործությունը, գորգագործությունը, փայտի զեղարվեստական փորագրությունը, զարդեր, տարազ և այլն:

Լևոնյանի հետաքրքրությունները չէին սահմանափակվում միայն հայ արվեստի խնդիրներով. նրա ուշադրության կենտրոնում էին նաև մյուս ժողովուրդների կերպարվեստի պատմությանն առնչվող հարցերը: Լևոնյանը կազմեց էջմիածնի տաճարի նկարների համեմատական ցուցակը և գրեց այդ շրջանի արվեստի պատմության սեղմ շարադրանքը՝ «Հովնաթանյան նաղաշները հայ նկարչության պատմության մեջ», որը 1938 թ. Հայաստանում տպագրվելուց հետո թարգմանվեց նաև ռուսերեն: 1946 թ. հրատարակեց «Հայ գիրքը և տպագրության արվեստը» արժեքավոր աշխատությունը:

Մարտիրոս Սարյանը Գարեգին Լևոնյանի մասին գրել է.

«Նրա կյանքի նպատակն էր՝ ժողովրդի մեջ սեր առաջացնել դեպի արվեստը, մարդկանց մոտ զարգացնել զեղագիտական ճաշակ... Նա երազում էր՝ տեսնել բարձր զարգացում ունեցող արվեստաբանական քննադատություն, ձգտում էր երիտասարդ սերնդի մեջ սեր առաջացնել դեպի արվեստաբանությունը... Մինչև այժմ իմ հոգում պահպանվում է այդ բացարձակապես բարի, ազնիվ և անկեղծ, խորապես կիրթ և ինտելիգենտ մարդու կերպարը»:

Մ. ՆԱԶԱՐԵԹՅԱՆ